

欽定剿平粵匪方略

欽定勦平粵匪方略卷九十 甲寅年

四月十二日

庚辰

勝保奏言該逆竄擾梁山後於

初六日丑刻向南奔竄經臣軍疾馳三十餘里始能追及沿途斬殺數百名該逆至鉅野縣因官兵緊躡穿城而過不敢少停適有告假在籍頭等待衛田在田率領團勇千餘名將其截殺百餘名逆衆又復南奔官軍追至陽山地方又

斃賊二百餘名並將山下要路截住臣先派馬  
隊赴金鄉迤南自督馬隊從北繞東縱擊該逆  
果於夜半潛竄經先到之兵分路迎截不敢入  
城臣一面分飭吉林黑龍江官兵追殺賊之前  
隊一面留兵分圍各村極力搜殺斬獲一千餘  
名其裹脅之眾臣本欲一概加誅見其伏地痛  
哭詞意懇至且察其情狀蓄髮雖已數寸其中

多係商賈莊農遂仰體

皇上德意准令薙髮派副都統綿洵常亮妥爲料理就

近發交金鄉縣安置分起解歸臣一面馳追前

隊之賊午刻過曹馬集沿途皆有斬擒行至趙

莊又有賊衆數百不能狂奔入村占踞經吉林

黑龍江營總巴彥呼朗莫爾廣額等斬殺殆盡

仍復極力窮追尙餘逆匪二三千人竄入豐縣

城中臣趕到後查知百勝派山西大同鎮兵六百名在賈家樓一帶堵截臣復派營總那爾瑚善托克通阿帶領馬隊官兵四百餘名先行馳赴盤龍集一帶以便截擊一面分撥各起馬隊圍列縣城西北西南兩面以便覘賊動靜設法勦辦奏入

上命軍機大臣傳諭勝保曰該大臣前奏逆匪奔上梁

山乘夜南竄計節次擊斬所餘不過四五千人我兵步隊縱或不能趕到何以跟蹤追擊之馬隊亦不能極力扼截致令徑由鉅野金鄉竄入豐縣我兵忍飢追趕晝夜馳騁誠屬實情而該逆於鉅野穿城而過金鄉不敢入城沿途皆曾被蹂躪之區諒亦無可擄掠以窮蹙喪膽之衆其行轉疾於得勝之兵殊不可解豐縣緊接黃河設再令由偷渡處所依舊南奔該

大臣但事尾追竟不能將此窮寇掃除淨盡但謂河北肅清豈遂可以塞責若令久踞豐縣又復築壘空濠我兵但事圍攻如靜海阜城故事久且仍令逸出與皖省賊匪復圖勾結勦辦何時蕺事該縣前經賊匪竄擾疊經諭令百勝王夢齡嚴防河岸不准南來之匪續行北竄卽不得令北路之匪回竄而南何至一無準備縣城復爲賊踞是否該縣文武先期逃避

該處土匪勾結開城該鎮道專轄河工地方何以不  
派兵迎截與該大臣追兵合力夾擊著該大臣查明  
速奏並先將畏葸逃避之員卽於軍前正法至所稱  
乞降脅衆三百餘名旣已蓄髮數寸豈得因其詞意  
懇至信爲商賈村農墮其奸計其甘心久於從賊卽  
應概與駢誅且金鄉甫被滋擾民心未固又以此項  
降衆多名安置該縣焉保其不故智復萌爲河北留



此餘孽並恐豐縣城內卽有似此匪徒先行潛入以致迎賊失陷該大臣務須濟以嚴明不事姑息將此股餘匪勦殺無遺迅卽收復縣城萬不得令復行渡河滋擾致干罪戾

上又命軍機大臣傳諭楊以增百勝王夢齡曰前此逆匪由豐工竄越黃河長驅北犯百勝王夢齡近在徐州防河是其專責乃任令逆衆從容紮筏偷渡數日

之久一無攔阻已屬形同聲噴比經勝保由臨清扼  
截追殺該逆果卽亡命南奔節次嚴諭楊以增並百  
勝王夢齡等加意嚴防毋令南賊續行偷渡北賊乘  
虛竄入該鎮道等應如何實心堵禦稍贖前愆茲據  
勝保馳奏由鄆城之梁山一路追勦直至金鄉以南  
沿途斬擒無算下餘逆賊二三千人竟於初七日竄  
入豐縣城中是直以厯奉嚴旨視爲具文殊堪痛恨

該逆負隅死守乃其長技豐縣一城爲南北衝要西  
與豫皖接壤尤不可不防其會合勾結致令廬州六  
安之賊接踵而至復肆鴟張著楊以增嚴飭百勝王  
夢齡一面就現有官兵練勇督令隨同勝保協力進  
攻一面分防南北河岸毋令該逆復又乘隙竄突儻  
賊匪不能剋期剿滅堵禦仍有疏虞朕必將百勝王  
夢齡立予正法斷不能再從曲宥楊以增職司總河

亦不得以該處距清江稍遠謂可置身事外希冀倖  
邀寬典也懷之

同日琦善奏言查浦口六合均係江防要地若  
有疏虞可由陸路繞至揚城西北襲我軍後路  
又可由儀徵沿江而下水陸並進所關匪細此  
次賊船滋擾浦口連日屯泊江干並不駛回南  
岸愈聚愈多臣於無可抽撥之中復撥馬步官

皇朝通志卷之二  
兵五百餘名馳往策應並擬將德崇阿錫給所  
帶馬步官兵暫調回揚相機派撥奏入

上命軍機大臣傳諭琦善曰本日據琦善奏報仍係賊  
撲浦口等處於瓜州攻勦情形毫未敘及前次賊在  
揚州並未大受懲創不過從容遁去朕僅將琦善革  
職稍示薄懲猶復畀以勦賊重任原冀琦善愧奮圖  
功乃自事權歸一以後仍不能迅克瓜州於艇師推

諉藥鉛缺乏事事歸過於人於接仗進攻不過小有  
斬獲遷延至今轉稱瓜州浦口兩處皆當要衝竟似  
有不能兼顧之勢數月以來所布置者安在總之琦  
善所統之兵如何調撥應防應剿朕皆不爲遙制但  
以瓜州之賊能除浦口之防無誤爲真實憑據若僅  
以抽撥隊伍拏獲奸細數日一奏或懼於虛聲束手  
無策儻賊匪果有再撲揚城之事琦善卽陳奏在先

遂得諉爲無罪乎著卽嚴督水陸各軍趕緊進剿並  
浦口續辦情形迅速馳奏不得再有延誤

同日荊州將軍官文副都統貴陞奏言據荊州  
府知府達昌阿等稟稱土匪勾結逆賊於三月  
初五日竄擾監利沿江水陸道路梗塞荆郡東  
南皆爲賊匪盤踞之地臣等現派兵在荆郡水  
陸各要隘嚴密防堵以截其上竄之路至岳州

大股賊匪乘虛窺伺不可不防相應請

旨飭下四川督臣令將巴東駐紮松建二鎮官兵二千  
名迅速來荆助勦奏入

上命軍機大臣傳諭台湧官文貴陞曰現在漢陽漢口  
一帶賊蹤未就殄滅德安應山等處逆燄復肆狻獠  
而監利一縣又被土匪勾結逆賊竄踞城市該處接  
壤江陵爲荊州要衝亟應及早殲除免致蔓延爲患



官文現復添派弁兵前往協勦合之守備福興等管帶進勦之兵勇一千二百名是否全數勦辦駐紮巴東之建昌松潘二鎮官兵節經諭令裕瑞迅飭帶兵之總兵雙保福忻飛速前進何以尙未趕到著官文等趕緊派員迎提毋任再有延宕一面就現有兵勇督飭在事文武員弁併力截勦剋日收復縣城貴陞統兵駐紮荆郡水陸要隘自係爲嚴密籌防起見仍

須探明逆蹤所向相機迎擊力扼賊衝其竄回岳州  
之賊大舉南犯已由甯鄉直趨湘潭並著官文激勵  
城守兵丁妥爲布置以固藩籬

十三日辛巳僧格林沁西凌阿托明阿奏言逆匪

自占踞濠邊我兵連日進攻斃賊無數並屢覓  
人夫另挖長濠該逆恐長濠工竣不能脫逃於  
初九日夜全股南竄臣等當卽帶領馬隊官兵

跟蹤追擊沿途殄斃多名奪獲大礮三尊該逆  
分爲兩股一股抗拒我兵一股竄至連鎮查連  
鎮東西兩鎮中隔運河我兵追至河邊苦無船  
橋臣僧格林沁沿河尋渡至距連鎮二十里之  
東光縣地方始得渡河該逆已搶劫民間木料  
搭造浮橋占踞東西兩鎮並附近村莊現在臣  
僧格林沁臣西凌阿在河東紮營臣托明阿在

河西屯紮趕緊催調步隊以便合力進攻並令  
侍郎培成副都統那敷德帶領馬隊官兵星夜  
馳赴桑園地方擇要屯紮一得該逆竄逃之信  
卽迎頭截擊奏入

上命軍機大臣傳諭僧格林沁曰此次追勦賊匪雖有  
斬獲而我兵傷亡亦復不少該逆竄據阜城已幾兩  
月朕疊降嚴旨諭令掃穴擒渠不准再有竄逸於該

大臣調兵調礮無不立允所請原冀僧格林沁早將此股賊匪殄滅以保全朕倚任之恩茲閱該大臣奏報卒令潰圍撲出復踞連鎮我兵追勦又落後著該大臣疊次所謂布置者安在連鎮地方分據運河兩岸西南可達景州東南可達吳橋由河而北又距泊頭鎮不遠若不就地殄除又恐蹈獨流故轍勦辦何時戴事此股竄匪務當乘其喘息未定督飭馬隊官

兵實力截擊悉數殲除儘令該逆又在連鎮地方久踞或又竄踞他處朕必治僧格林沁貽誤之罪別亦無可再論矣

同日文謙奏言據青縣等處稟報阜城賊匪全股竄至連鎮查該處距天津三百數十里一水可通該逆亡命狂奔去來未定津郡較爲喫重防守甚單查現在駐守楊村之載堪距津較近

如賊匪竄係東竄 臣卽帶勇相機前進可否先  
令載堪帶兵來津會勦奏入得

旨 惠親王等速行酌擬具奏

同日巡防王大臣奏言查載堪帶兵駐守楊村  
情形不甚喫重而距津較近應由 臣等札知載  
堪將所帶駐守楊村之兵先行赴津合力防守  
奏入

上命軍機大臣傳諭載齡曰阜城逆匪全股南竄占踞連鎮東西兩鎮並附近村莊該處距天津三百餘里一水可通該逆亡命狂奔津郡較爲喫重現存兵勇單薄著載齡迅卽飭令載堪將駐守楊村官兵五百名卽日管帶馳赴天津與文謙合力守禦

上又命軍機大臣傳論文謙曰阜城賊匪竄踞連鎮跨占運河與天津一水可通自應豫爲嚴密防守該郡



存兵分撥各處殊虞單薄載堪帶兵五百名駐守楊村該處情形現在不甚喫緊而與津郡相距較近已諭載齡派令載堪將所帶之兵由楊村移赴天津會同文謙合力守禦著文謙就現存兵勇與載堪慎密妥籌並激勵紳民同心勦力幫同巡緝以期先事豫防

十四日

壬午

勝保奏言該逆占踞豐縣城垣臣於

初九日親督兵勇分攻四門並令綿洵克興阿  
托克通阿繼福列隊於東北南三面臣親率馬  
隊列於西面督陣該逆匿於屋內由牆孔放槍  
臣急令兵勇等奮勇向前拋擲火罐噴筒木城  
之內火乘風勢西南北三面同時延燒賊衆大  
亂避匿入城其被馬隊衝散餘賊紛踞沿途附  
近各村者經善祿及各地方官並聯莊團勇等

搜殺無遺臣揆度賊情窮蹙已極斷難久踞當  
卽乘馬詳看城外地勢指示帶領馬隊各員分  
路布置二更後賊果向西南竄出因見我兵列  
隊甚嚴折而東竄臣卽督令馬隊馳往李九集  
一帶杜其西竄並派官兵於蟠龍集口門扼住  
南路一面令善祿赴東南督擊復派綿洵托克  
通阿乘夜跟蹤追截擊殺十餘里天色微明賊

衆向東狂奔我兵追及賊復拚命抗拒我兵奮力擊殺斃賊數百名賊勢不支拋棄槍械向前奔竄我兵追殺已抵漫口支河河水陡漲湍流甚急馬賊千餘名均陷泥淖我兵乘勢掩殺斃賊無數逆衆百餘圍繞逆首旋轉河岸經我兵連放槍箭擊斃數十人該逆自知無可倖逃一同躍馬入水僞丞相曾立瑄許棕洋登時淹斃

偽副丞相陳侍保據獲賊供稱已於本月初二日在冠縣孝頭谷地方被官兵殲斃並斃其偽指揮陸姓藍姓其餘廣西老賊俱已盡數殲斃淹沒並無一名漏網查此股逆匪渡河北犯旣欲救應阜城又欲直趨津郡自攻陷臨清後賊志益肆經臣等日夜勦辦逮克復臨清痛殲逆黨辦理雖漸得手而該逆猶窺伺東昌大名等

處希圖北犯自清水集殲去悍賊之半賊膽始  
寒此次所餘數千逆衆頃刻殲除實足以快人  
心而伸

天討其在事文武員弁兵勇可否仰懇

天恩准臣擇其尤爲出力者酌量保奏以示鼓勵

勝保又奏言臣所統馬步官兵從征日久器械  
衣履俱多不齊若不暫予休息令其趕緊製備

勢難整旅南下各處征兵距營遠近不一若令其歸伍備辦往返需時不日卽當南征又恐有誤調遣臣查大名曹州距黃河最近與河南接壤俱屬緊要之區再四思維擬將步隊暫駐曹州馬隊暫駐大名俾得休息以便南下其器械衣履卽令趕爲備辦聽候調遣臣現擬統帶黑龍江吉林馬隊官兵並直隸通永宣化正定天

津步隊官兵北上將步隊官兵卽留阜城助勦  
仍酌度緩急如需臣會合辦理卽當前往會辦  
俟歲事後再行進京儘僧格林沁可以得手臣  
卽將所帶官兵留於阜城兼程入都面聆

聖訓現在阜城逆匪南竄必當爲迎截之計臣卽統帶  
所部分兩岸前進相機迎截以期殲斃無遺不  
敢稍分畛域奏入



上命軍機大臣傳諭勝保曰該大臣轉戰經年力挫兇  
鋒茲復從臨清追賊直至豐縣將此股逆匪悉數掃  
除自宜渥沛恩施以酬勞動並令各省軍營將士知  
所感奮迅奏蕩平惟楚皖逆氛方熾大江南北首惡  
稽誅東南民生顛連困苦之狀朕每一思之難安寢  
饋卽阜城窮寇現復南竄連鎮思爲困獸之鬪未能  
卽時廓清肘腋之患未除宵旰之憂彌切乃勝保遠

以紅旗馳報河北肅清不知朕所期望於該大臣者至大至遠似此鋪揚過甚殊覺跡涉矜張該大臣承受朕恩益當加以敬畏軍士從征勞苦致器械衣履不齊卽飭趕緊備辦仍一面加意拊循至步隊各官兵著照擬暫令駐紮曹州派善祿統帶搜捕餘孽彈壓土匪就近與百勝等聯絡聲勢嚴防南匪續行北竄並可爲豫楚一帶援應該大臣旣令馬隊官兵緩

赴大名親自統帶分兩岸前進迎剿阜城竄匪卽當  
與德勒克色楞兼程北行會同攻剿此時斷難來京  
陛見連鎮踞匪不卽殄除恐蹈獨流故轍著勝保迎  
頭兜擊與僧格林沁合力夾攻不准該逆蔓延他處  
並不得令久踞連鎮重煩兵力朕方拭目以待該大  
臣等肅清河北同膺懋賞也朕於疊次諭飭勝保之  
旨訓勉之中恩眷備至該大臣果能懷遵與面承方

略無異亦何必亟請入覲始能兼受機宜且朕信任該大臣畀以統師重任該大臣既知無不言朕亦悉如所請不爲遙制尙何虞有所隔閔總以羣醜悉就殲滅寰宇均獲乂安爲該大臣之不負朕望耳

上又命軍機大臣傳諭僧格林沁曰本日據勝保馳奏勦辦臨清竄匪於初九日在豐縣黃河北岸殄滅淨盡因聞阜城逆匪全股撲出擬酌帶馬步各隊官兵

確探賊蹤相機迎截僧格林沁惟當懷遵疊次嚴旨  
速將連鎮盤踞賊匪就地殲除無留餘孽不得因勝  
保督師折回稍存觀望致失事機刻下大江南北尙  
未蕩平皖楚賊氛甚熾朕睠懷南服深切隱憂而阜  
城之賊圍攻兩月尙未能悉數殲擒又令他竄爾等  
帶兵大臣當如何愧憤焦急迅圖蕝事勝保勦辦臨  
清竄匪能將全股殄除辦理甚屬迅速惟遠稱河北

一律肅清竟以紅旗報捷跡涉矜張殊失朕望此時  
連鎮餘匪再加以勝保得勝之兵自無難剋期殄滅  
僧格林沁秉心誠樸不尙虛文朕所素知卽日連鎮  
全股賊匪殄滅亦不必以紅旗報捷致涉鋪張該大  
臣務當與勝保合力同心迅奏膚公共膺懋賞

上諭內閣曰本日勝保等由八百里馳奏官兵勦辦賊  
匪殄滅淨盡首逆伏誅此股逆匪由豐北渡河竄入

東境勢甚猖獗經勝保等督兵迎勦克復臨清州城  
屢獲勝仗該逆勢窮力竭亡命狂奔復經該大臣督  
率馬步官兵晝夜窮追馳行數百餘里於豐縣漫口  
支河將潰竄餘匪二千餘名全數殄滅計該大臣等  
自臨清追賊南下疊次大獲勝仗擒斬及擊散賊匪  
數萬人辦理甚爲迅速深堪嘉尚勝保著加恩賞加  
太子少保銜並賞還花翎開復降級留任處分並頒

賞御用冠一頂巡幸褂一件御用銀帶一分大荷包  
一對小荷包四箇珊瑚帽頂一箇白玉巴圖魯翎管  
一枝德勒克色楞善祿均著賞穿黃馬褂並頒賞黃  
馬褂各一件大荷包各一對小荷包各二箇白玉巴  
圖魯翎管各一枝以示優獎所有在事出力之文武  
員弁兵勇著該大臣等查明保奏候朕施恩現在阜  
城賊匪竄踞連鎮經僧格林沁督兵攻勦屢有斬擒



著勝保酌帶馬步兵勇迅速會勦掃蕩妖氛肅清畿  
輔以慰朕望

同日袁甲三奏言臣於三月二十二日自臨渙  
起程於二十九日行抵臨淮當查定遠界接廬  
城現經和春福濟等於店埠柘皋等處各安大  
營以遏賊竄之路廬州大營所需餉銀軍械均  
由臨淮派勇分起護運經過定遠往來七八百

人相望於路亦可藉壯軍威其正陽關一路秦  
定三遵

旨駐防已於初八日行抵鳳陽臣親赴鳳陽接見將正  
陽一帶防勦事宜並臣與霍邱縣紳民先行籌  
辦各情形詳細面商秦定三樸誠勇敢亦能和  
衷商推西路似可無虞奏八

上命軍機大臣傳諭袁甲三日前據和春等奏令秦定

三統領郝光甲劉玉豹官兵赴正陽關扼截並兼顧壽州霍邱等處以固西北門戶現在秦定三已抵鳳陽袁甲三亦進駐臨淮正可聯絡聲威杜逆匪續竄之路其臨淮以南地勢旣以總鋪爲定遠北路要衝且可通鳳陽五河卽著飭令吉連等擇要紮營藉壯聲援和春等在廬州已連毀賊營直逼城下計日當可克復惟攻克後潰匪奔突不可不扼要截擊毋令

遠竄又擾他處至臨淮爲大營運餉必由之路並著  
多派兵勇隨時防範

袁甲三又奏言 臣前於臨淮拏獲奸細爲粵賊  
私買硝磺現又盤獲阜陽縣販馬四人搜出粵  
賊給予偽札內稱沿途勿得攔阻是該逆勾通  
奸民幾於到處皆是本月二十日忽有小船蠶  
擁來淮貴價買米運至下游數日之間米價增

至一倍探知小船之米均運入洪澤湖歸併大  
船駕船人多係湖北口音該處米價並不昂貴  
何以買米販運如此之多形跡不無可疑現當  
賊焰方張布滿奸細不得不加意嚴防應請

飭下河臣楊以增密派委員於洪澤湖上下及緊靠湖  
岸之盱眙縣一帶嚴密稽查防範以杜奸萌奏  
八

上命軍機大臣傳諭楊以增曰洪澤湖周圍廣闊交通  
江河賊蹤最易潛藏現有小船運米入湖顯係接濟  
逆匪該地方官何以毫無覺察淮揚等處偏近賊氛  
奸細潛蹤在所不免必當嚴加搜捕勿令窩藏著楊  
以增迅卽密派委員於洪澤湖上下及緊臨湖岸之  
盱眙縣一帶嚴密稽查如有此等形跡可疑船隻著  
卽查拏究辦本日勝保奏豐縣逆匪業已追至河邊

殲除淨盡該縣民人重被蹂躪深堪憫惻著楊以增  
就近妥爲撫綏俾無業窮民不致流而爲匪此股逆  
賊雖經大兵勦洗尙恐有逃散餘匪與土匪乘閒滋  
事且恐南來匪徒續行偷渡並著該河督嚴飭百勝  
王夢齡及地方河工文武員弁實力巡防不得稍有  
疏懈

十五日

癸未

琦善奏言浦口官兵於本月初三日

四更出隊至寶塔根一帶次日黎明逆匪千餘人分三股上岸武慶等督兵分路截剿斃賊無數賊由馬家莊一帶抄襲復經擊退隨督兵盡力攻剿圍賊於塔山之下又斃賊匪三四百人偽頂天侯秦回南等均被擊斃查浦口兵單賊衆該總兵連日督兵鏖戰大獲勝仗洵足以寒賊膽惟逆匪大受懲創必不甘心現在賊船尙



未駛回南岸必圖勾結報復臣已嚴飭該總兵等加意防範奏入報

十六日

甲申

僧格林沁西凌阿托明阿奏言該逆

占踞連鎮步隊官兵陸續到齊臣等商定合力

進攻臣僧格林沁臣西凌阿帶領達洪阿由東

岸進攻臣托明阿帶領瑞麟伊勒東阿由西岸

進攻我兵行至賊巢吶喊齊進該逆暗放槍礮  
密如雨下我兵冒煙而進該逆隨由兩岸撲出  
數百名我兵槍箭齊發斃賊數十名該逆拚死  
抗拒勢甚兇猛侍郎伊勒東阿左臂受鉛子傷  
仍負痛督兵將該逆擊敗回巢是日之戰各路  
馬步官兵無不奮勇爭先惟

盛京第七八起帶隊官員因馬受礮傷輒敢退後

以致兩起兵丁畏縮不前當攻勦萬分喫緊之際若不從嚴懲辦何以申明紀律相應請

旨將營總佛恩恩祿卽行革職該逆飄忽靡定亟宜防其回竄及順流復擾天津現已將各營步隊官兵屯紮西岸先於西岸挑挖長濠並札調天津船隻停泊下游以阻其回竄之路其天津東南二面仍擬挑濠築壘待賊匪捨命撲出以便攻

勦奏八

上命軍機大臣傳諭僧格林沁曰逆匪竄擾連鎮跨河營巢若待其布置已定勢必至如獨流故事攻勦難以得手該大臣與西凌阿托明阿分紮東西兩岸並密防該逆回竄西北之路復將天津船隻停泊下游使賊衆不得擾及津郡逆匪自阜城竄出並非窮蹙奔逃一到連鎮卽死守抗拒該大臣於東南二面挑

濠築壘誠恐堽圍嚴密益堅該逆負嶠固守之心此  
次馬步官兵雖極奮勇而賊巢仍未攻破且致伊勒  
東阿臂受槍傷是其明證不如誘令離巢設伏以待  
一俟該逆撲出迅卽合圍堽擊俾該逆不得回奔入  
巢再以奇兵將賊隊衝斷勦洗更易得力著該大臣  
等酌量辦理萬不可專待勝保兵到致延時日前因  
德勒克色楞接仗受傷特派乾清門侍衛恩全前往

看視本日已諭令勝保迅飭恩全馳赴連鎮察看軍營情形回京覆奏該大臣務將現在賊情及一切布置告知恩全卽飭令回京以慰朕念

上又命軍機大臣傳諭勝保曰勝保統領得勝之兵由運河兩岸前進此時不知行抵何處阜城逆匪竄踞連鎮僧格林沁督兵進剿僅獲小勝想勝保沿途已有探報本日已諭知僧格林沁如逆匪死拒難於得

手卽設法偏令出巢以便南北夾擊勝保當亦豫計  
及此該大臣所留曹州步隊官兵三千餘名原爲備  
辦軍裝聽候南征之用此時皖省軍務節經朕指示  
機宜分派袁甲三秦定三嚴防臨淮正陽兩路和春  
等進攻廬州兵力亦不爲單薄惟楚豫交界自應山  
德安先後失守賊又北撲隨州西擾安陸台湧原帶  
之兵本係堵截殘敗之餘今復疊次潰失幾不成軍

河南武勝等關防兵甚少雖儘數湊調僅止千餘舒倫保由汜水縣前赴武勝關所帶官兵僅一千餘名後隊甯夏官兵數百名尙未能趕到似此兵力單薄恐難堵禦著勝保卽將留駐曹州之陝甘官兵酌撥一千名或一千五百名交桂明統帶星速馳往武勝關或防或剿隨時酌度辦理該提督與舒倫保所帶之兵均係陝甘勁旅自可聯絡得力其餘官兵仍留



曹州以備調遣現在楚豫交界較之皖豫交界尤爲  
喫重荆州已有賊蹤安陸復偏近襄陽湖南上竄之  
賊已越長沙而至湘潭曾國藩師船及四川沿江東  
下之兵均屬緩不濟急必須近移得勝之師方足以  
扼北竄勝保統籌大局定能熟悉機宜也前次派往  
看視德勒克色楞之侍衛恩全當已早抵軍營著勝  
保卽將該侍衛帶赴連鎮軍營或卽令該侍衛先行

馳往速將該處形勢軍情詳細查勘於回京時據實覆奏總以迅速爲要朕日盼畿疆綏靖早奠民生該大臣等務當合力同心殄茲窮寇無負厚望

上諭內閣曰逆匪竄踞連鎮經僧格林沁派兵接仗各路馬隊官兵俱屬奮勇爭先惟盛京馬隊官員輒敢退後以致兩起兵丁相率退縮實屬怯懦無能營總佛恩恩祿均著卽行革職並著將先行退縮之兵查

明正法

同日台湧奏言據獲賊供稱應山賊衆約計三千有餘現來德安之賊一二千人擬於四月初五六日前來撲關往攻信陽因聞此閒調來北兵多至數萬是以未敢遽進又據由應山城內逃出難民報稱賊衆在城一日數驚紛紛戒備現有退回德安之意復探聞前此竄往隨州之

賊因聞北兵由棗陽一帶進剿未敢北向遂卽折竄安陸府境臣思趁賊疑懼之時正可督兵克復郡縣無如兵太單薄誠恐一戰弗克轉爲賊所輕視勢不得不俟兵力稍集以期一鼓作氣乘機迅掃奏入

上命軍機大臣傳諭台湧曰所稱賊衆心懷疑懼不敢冒險北竄現因兵力單薄恐一戰弗克啟賊輕視之

見自係實情因思提督桂明前帶陝甘官兵二千餘名隨同勝保勦辦北竄臨清逆匪業已全數勦除本日諭令勝保將此項得勝之師由該提督統帶起程開道馳赴武勝關協同台湧併力進攻爲移緩就急之計著台湧卽就現有兵勇防勦兼籌西路安陸荊州緊接襄陽與豫省毗連處所路徑紛歧該督尤須妥籌兼顧總兵柏山前赴桐柏唐縣防守現在該處

是否適當賊衝並著台湧嚴飭該總兵相機出境迎  
截毋許株守一隅

十七日乙酉勝保奏言阜城逆匪如果由東南竄

出則德州東昌一帶頗形喫重臣定於十三日

督帶馬隊及雙禧所帶步隊官兵由濟甯東平  
取道順運河東岸前進善祿帶步隊官兵由金  
鄉鉅野取道順運河西岸前進同赴東昌一帶

身之身目二目夕フ一  
三二

沿途據明賊蹤所在合力迎擊其桂明所帶陝  
甘官兵仍令統帶暫駐曹州既可扼南北之衝  
將來大兵南下時並可就近調遣奏入

上命軍機大臣傳諭勝保曰曹州地方當南北之衝固  
屬緊要惟此時楚豫交界情形甚爲喫重自應仍飭  
桂明帶兵赴武勝關以資防勦善祿旣帶步隊官兵  
由金鄉一帶前進其留駐曹州之兵應派何員統帶

著該大臣酌量情形妥速布置至阜城逆匪竄踞連  
鎮昨諭僧格林沁誘賊離巢設伏以待若該逆果向  
南潰竄該大臣等由運河兩岸前進正可迎頭截擊  
儻仍伏匿連鎮該大臣務與僧格林沁合力夾攻就  
地鏟除此次保舉單內各員並無蒙古官兵是否該  
官兵於克復臨清時勦賊未甚出力抑或有遺漏之  
處著該大臣迅卽查明具奏蒙古列在藩服儻著有



勞績尤應破格請獎斷不可令其湮沒不彰至軍營  
打仗衝鋒冒險武職居多勝保將文職開列在前亦  
屬非是統兵大臣首在賞罰平允卽輕重先後之間  
亦須權衡至當始足以鎮服軍心慎勿蹈重文輕武  
積習

同日和春福濟奏言四月初九日官軍進攻廬  
城先取文昌樓賊營臣和春居中調度臣福濟

統領各路官兵在後策應鄭魁士等會合官兵  
四面圍攻連拋火罐火箭頃刻之間樓卽倒塌  
賊匪紛竄我兵一擁而入盡力砍殺立將賊營  
踏毀南門突出逆匪三四千人復經我軍擊斃  
無數是日約斃匪五六百名砍獲首級二十七  
顆初十日東南兩門撲出賊匪數千人南路又  
擁聚數千分股來撲鄭魁士督催各隊連放槍

三三三  
三三三  
礮逆匪紛紛倒地屍橫遍野並擊斃黃衣騎馬  
賊二名得勝門又出賊匪二千餘人復經我軍  
抄擊敗退是日接仗四時之久斃匪一千餘名  
砍獲首級五十一顆奪獲器械多件臣等惟有  
再行設法圍攻迅圖克復奏入

上命軍機大臣傳諭和春福濟曰連日督兵進剿燒燬  
賊營雖搃斬尙多仍未能將廬州克復現在勝保已

將續行北來賊匪於豐縣全行殲滅廬州之賊自必  
聞風膽落該提督等正當乘此督率將弁兵勇迅復  
郡城秦定三計已抵正陽關卽飭督同郝光甲劉玉  
豹等勦辦六安霍邱一帶賊匪嚴防北竄安慶舒桐  
等處賊勢如何亦須設法激勵紳民散賊黨與斷賊  
接應和州地方與江浦接壤著卽相機布置隨時與  
袁甲三秦定三知照接應不可稍有疏虞

上諭內閣曰此次廬州逆匪分路撲出勢極兇猛經和春等督飭兵勇連獲勝仗著卽乘勢進攻迅圖克復鄭魁士先後進勦屢立戰功著開復副將儘先補用